



Fasnacht 2024

Vereinigte Kleinbasler 1884 Alti Garde

Schatte für Basel

Die letschti Yysztyt isch verbyy,
die nэгgschty kunnt schyns nit so glyy.
Das heisst mir sinn jetzt zwüschedrinn,
drum ischs so warm, das macht glaub Sinn.
Me seets scho an verschidne Sache,
dass d Wärmi duet Beschwärde mache.
Yysbare suecht me do vergäabe,
well si jetzt im Norde lääbe.
Läbte die Bäre do, die Wysse,
si wurde s Fäll vom Körper rysse.
Und d Pinguin sinn in Süde zooge,
d Hitz duet si dörte nümme blooge.
Drfür gits Wölf und bruuni Bääre,
wo s Fäll am liebschte wurde schääre.
Denn au liie, wie me weiss,
macht das digge Fäll vyyf z heiss.
Dass d Wölf vor Hitz nit aafödn lalle,
ka me si au aabeknalte.
Und d Vögel hänn, s isch allerhand,
uff iire Flügel Sunnebrand.
S wird als wie helsser jedes Joor,
d Gsundheit isch in Gfoor, s isch woor.
S duet mit dr Wärmi wirgglig gnlege,
wenn d Schiine sich sogar verbiege.
Am Banggeplatz sinn, s isch nit glooge,
Drämmli us de Schiine gflooge.
D Velo blyybe im Verkehr
stegge wäg em weiche Teer.
D Stei sinn heiss, s isch nit zum lache,
me könnt druff Spiegeleier mache.
Wenn d Kieh nur suuri Milch abgänn,
und alli in e Brunne wänn,
wenn kuum me schnuufe kasch vor Hitz,
hilft au e yyskalt Bier kei bitz.
Was denn no hilft, s erstuunt jo kuum,
isch e klimatisierte Raum.
Wird bi de Mensche s Hirni z heiss,
kunnt Schwachsinn uuse, wie me weiss.
Au s Esthi Käller hetts glaub droffe,
si isch ganz schön ins Offsite gloffe.
Hett gmeint si könn sich profiliere,
drby duet si sich nur blamiere.
D Idee isch, alle Schatte z spände,
drmit die grossi Hitz abwände.
Will s ganze Volgg vor Wärmi schütze,
merggt nit, dass es nüt duet nütze.
Mit Sunnesätigel in dr Freie
will si s Volgg vor Hitz befreie.
Statt Diecher über Stroosse hängge,
könt me em Volgg doch Kappe schängge.
Dr Grossroot het au z heiss bikoo,
andersch isch das nit zverstoo.
Si spräche nünehalf Millioone,
damit mir kiehler solle woone.
Me duets für Sunneschirm verwände,
wo solle bitzli Schatte spände.
D Baum uff dr Pfalz die duet me felle,
zum Sunneschirm dört aane z stelle.
Die wunderschön und toll Beschattig
benutze d Hündli für d Begattig.
Für ei Sunneschirm elei,
zahlt me schyns zäädausig Stei.
Hundertfünfenünzig sinns total,
das isch doch geschpunne, nit normal.
Denne kauft me Gstrüpp und Pflanze,
voll mit Spinne, Käfer, Wanze.
Dört dörfe Bsuecher drunter sitze,
damit si nümme sotte schwitze.
Schatte solle d Pflanze spände,
doch sinn si für das nit z verwände.
Bim Baudep hänn si nit begriffe,
dass numme d Hünd gäm aaneschiffe.
Zäädausig koschtet ei so Baum,
s isch wirgglig woor und nit e Draum.
E bsundre Gspass, wo au nüt bringt,
isch Wasser wo us Düse dringt.
Dä Wassemäbel wo sott kiehle,
isch in Wirggligkeit zum Briele.
Denn lauft me drüber, jetzt muesch loose,
sprützts vo unde grad in d Hoose.
Drzue isch d Brülle pfläddernass,
dass nüt me seesch, das isch doch grass.
Me kiehlt sich lieber s blybt drbyy,
mit me Gump in warme Rhyy.
Denn gits no s Döppli uff em Y,
me meint das ka doch gar nit sy,
um dä Schattewahnsinn z blaane
mien no mee Staatsbeamti aane.
Mir froogen ys wie kaame numme
mit so vyyf Gäld, e riise Summe,
für Schatte soone Uffwand mache?
Die ganzi Schwyz duet drüber lache.
Drzue wird scho e Grücht verbreitet,
s Baudep syg guet vorbereitet,
bi Kälteyybruch, wens duet schneie,
dr Boode z heize in dr Freie.
Denn will me au, es hätt sy Nutze,
die vyyly warmi Luft benutze,
wo si im Baudep produziere,
durch d Stroosse in dr Altstadt fiehre.
S isch Zyt dä Unsinn rasch z beände,
Stürgälder uff die Art z verschwände.
Bevor d Regierig, voll drnäabe,
zum Schutz vo unsrem Ärdelääbe,
blaent zum alle Schatte gää,
im Summer d Sunne yyne z nää.